

KAROO HOOGLAND MUNISIPALITEIT



Die Munisipale Bestuurder publiseer hiermee, interme van Artikel 13 van die Plaaslike Regering : Munisipale Stelsels Wet, 2000 [Wet 32 van 2000] gesamentlik gelees met Artikel 162 van die Grondwet van die Republiek van Suid Afrika Wet 1996 [Wet 108 van 1996] die Verordening Rakende die Beheer oor die Aanhou van Honde wat in werking sal tree op die datum van die publikasie.

DOEL VAN DIE VERORDENING

Om voorsiening te maak vir die beheer oor die aanhou van honde in Karoo Hoogland Munisipaliteit en vir die aangeleenthede wat daarmee in verband staan.

Daar word bepaal deur Karoo Hoogland Munisipaliteit, soos volg –

WOORDOMSKRYWING

- [1] In hierdie Verordening, terme gebruik in die manlike geslag ook insluit die vroulike geslag, die enkelvoud sluit ook die meervoud in en andersom indien uit die inhoud anders blyk, beteken –

“aanhou” met betrekking tot ‘n hond, om toesig of beheer daaroor te hê of om dit in bewaring te hê of om skuilplek te bied aan sodanige hond

“eienaar” met betrekking tot ‘n hond, iemand wat ‘n hond aanhou en ook enige persoon aan wie die hond toevertrou is of wat beheer oor ‘n hond het ten opsigte van enige terrein binne die regsgebied van die munisipaliteit waar sodanige hond aangehou word of toegelaat word om te lewe of te bly

“gemagtigde beampte”-

- a. ‘n vredesbeampte soos omskryf in artikel 1 van die Strafproseswet, 1977 (Wet No. 51 van 1977) in diens van die Munisipaliteit
- b. Enige ander persoon hetsy in diens van die munisipaliteit of nie, wat as gemagtigde beampte deur die munisipaliteit aangestel is

“hond” vir doeleindes vir Artikel 3 (1) en 2 ‘n hond bo die ouderdom van 6 maande

“munisipaliteit” beteken Karoo Hoogland Munisipaliteit

“openbare plek” ook grond, ‘n park of oop ruimte, pad, straat, nagstraat of deurgang, brug, gebou of struktuur wat gewoonlik deur die publiek gebruik word, wat die eiendom van die munisipaliteit is, of waarvan die beheer tot volle uitsluiting van die eienaar in die munisipaliteit gevestig is, of waartoe die inwoners van die munisipaliteit ‘n gesamentlike reg of toegang het

“soneer” die grondgebruik aan ‘n perseel gekoppel kragtens enige wet, die dorpsaanlegskema of titelakte en

“straat” ook ‘n sypaadjie

[2] TOEPASSING VAN VERORDENING

Die bepaling van Artikel 3(1) en 5 is nie van toepassing op 'n perseel wat vir landboudoeleindes gesoneer is nie; met dienverstande dat iemand wat honde aanhou op 'n perseel wat vir landboudoeleindes gesoneer is nie van voldoening aan enige ander bepaling van hierdie Verordening of enige ander wetgewing wat van toepassing mag wees, vrygestel is nie

[3] GETAL HONDE

1. Behoudens die bepalings van subartikel 2 hou niemand, sonder die vooraf verkrygte skriftelike toestemming van die munisipaliteit meer as twee honde op enige erf of perseel aan nie
2. 'n Hondeteler wat meer as 2 honde –
 - a. Op 'n perseel wat vir landboudoeleindes gesoneer is wil aanhou, is geregtig om dit te doen
 - b. Op 'n perseel wat vir enige ander doeleindes as landboudoeleindes gesoneer is wil aanhou, moet die skriftelik toestemming van die munisipaliteit verkry
3. 'n aansoek om die munisipaliteit se goedkeuring ingevolge subartikel 2 word alleen deur die munisipaliteit oorweeg indien –
 - a. Die munisipaliteit oortuig is dat alle persele waarop honde aangehou sal word 'n gemiddelde grootte erf sal wees.
 - b. Die aansoek vergesel word van 'n aansoek om verandering van die grondgebruikbeperkings van toepassing op die perseel, waar dit nodig is.
4. Die munisipaliteit se toestemming ingevolge subartikel 2 (b) om meer as twee honde op 'n perseel aan te hou word verleen –
 - a. Alleen in daardie gevalle waar na aanleiding van advertensie ingevolge die betrokke wetgewing geen besware ontvang word teen die voorgestelde afwyking van grondgebruikbeperkings nie en;
 - b. Onderworpe aan die voorwaardes en beperkings wat die munisipaliteit nodig ag.
5. Die munisipaliteit kan, nadat behoorlike prosedures gevolg is, 'n toestemming ingevolge subartikel 2(b) toegestaan, terugtrek.

[4] BEHEER OOR HONDE

- a. Geen persoon mag toelaat dat sy/haar hitsige teef in 'n openbare plek kom nie.
- b. Geen persoon mag 'n hond aanmoedig of aanhits om enige dier of mens aan te val of skrik te maak nie, behalwe waar dit nodig is vir beskerming.
- c. Geen persoon mag 'n hond aanhou wat
 - i. onnodiglik blaf, kef, tjank of huil nie;
 - ii. die gewoonte het om motors, diere, pluimvee, duiwe of mense buite die perseel waar dit aangehou word, te jaag nie.
- d. Geen persoon wat 'n hond besit mag die hond in 'n openbare plek toelaat wanneer die hond aan brandsiekte of enige ander besmetlike of ander aansteeklike siekte ly nie

- e. Geen persoon wat 'n hond besit wat wild, kwaai of gevaarlik is mag in 'n openbare plek toegelaat word, indien dit nie genuilband is en aan 'n leiband onder die beheer van 'n verantwoordelike persoon gehou word nie.
- f. Honde eienaars mag nie toelaat dat hul honde privaatgrond betree/oortree nie.
- g. Honde eienaars mag nie toelaat dat hul honde 'n gevaar is vir verkeer wat enige straat of pad gebruik nie.
- h. Honde eienaars mag nie toelaat dat hul honde 'n bron van gevaar/ besering te wees of volgens sy of haar kennis om waarskynlik 'n bron van gevaar/besering te wees vir iemand buite die perseel waar die hond aangehou word nie.

[5] OMHEINING VAN PERSELE

Geen persoon hou 'n hond aan op 'n perseel wat nie behoorlik en genoegsaam omhein is om die hond binne te hou wanneer dit nie aan 'n leiband is nie.

[6] HONDE MAG NIE 'N BRON VAN GEVAAR WEES NIE

1. Iemand wat 'n hond op 'n perseel aanhou –
 - a. Neem redelik voorsorg om seker te maak dat die hond nie 'n bron van gevaar vir werknemers van die munisipaliteit wat die perseel binnegaan om hul pligte uit te voer, uitmaak nie en
 - b. Vertoon, in 'n opvallende plek, 'n kennisgewing tot die effek dat 'n hond op die perseel aangehou word.

[7] VERWYDERING VAN AANSTOOTLIKE STOWWE

Indien 'n hond in 'n openbare plek ontas, verwyder die persoon in beheer van die hond sonder verwyd die ontlasting, plaas dit in 'n plastieksak- of papiersak of omhulsel en gooi dit weg in 'n houer vir die weggooi van rommel en vullis.

[8] HONDE OP PERSELE WAAR KOS VERKOOP WORD

Enigeen wat die eienaar is of beheer is van 'n winkel of ander plek waar kos voorberei word, verkoop of uitgestal word, laat nie toe dat 'n hond in die winkel of op die plek is of bly nie.

[9] INBESLAGNEMING SKUT EN AFMAAK VAN HONDE

1. Enige hond wat in 'n openbare plek aangetref word en wat aan brandsiekte of ander aansteeklike siekte ly, of wat kwaai, wild of gevaarlik is of ernstig beseer is, kan deur die gemagtigde beampte van die munisipaliteit in beslag geneem en van kant gemaak word.
2. 'n Gemagtigde beampte van die munisipaliteit kan op enige hond wat in 'n openbare plek gevind word strydig met die bepalings van hierdie verordening beslag lê en dit skut op 'n plek deur die munisipaliteit bepaal.
3. 'n Hond wat ingevolge subartikel 2 geskut is, kan –
 - a. Aan die eienaar van so hond vrygelaat word teen betaling van 'n bedrag deur die munisipaliteit bepaal, bykomend tot enige koste, boete of belasting wat ten opsigte van die hond uitstaande mag wees of
 - b. Na verloop van 30 dae, deur die munisipaliteit van kant gemaak word of mee gehandel word na goeddunke van die munisipaliteit

[10] AANSPREEKLIKHEID

Nog die munisipaliteit, nog enige gemagtigde beampte of enige werknemer van die munisipaliteit is aanspreeklik vir of ten opsigte van enige besering of siekte opgedoen deur of skade aangerig aan enige hond as gevolg van of gedurende die inbeslagneming, skut, aanhouding of afmaak daarvan kragtens hierdie verordening.

[11] STRAFBEPALING

1. Iemand wat bepalinge van hierdie verordening of 'n vereiste of voorwaarde daar kragtens oortree of versuim om daaraan te voldoen is aan 'n misdryf skuldig.
2. Iemand wat skuldig bevind word aan 'n misdryf ingevolge subartikel 1 is strafbaar met 'n boete van R1000 of met die gevangenisstraf van hoogstens 1 jaar of met beide 'n boete en met daardie gevangenisstraf.

[12] HERROEPING VAN WETTE EN VOORBEHOUDE

1. Enige verordening rakende die aanhou van honde voorheen deur die Munisipaliteit of afdeling van die Munisipaliteit afgekondig nou herroep word vanaf die datum van die publikasie van die nuwe verordening.
2. Enige toestemming verkry, reg toegestaan, voorwaardes opgelê, aktiwiteit veroorloof of ding gedoen kragtens 'n herroep van wet word, na gelang van die geval, geag kragtens die ooreenstemmende bepalinge van hierdie verordening (as daar is) verkry, toegestaan, opgelê, veroorloof of gedoen te wees.

[13] KORT TITEL

Hierdie verordening heet die **Verordening op die Beheer oor Aanhou van Honde**, 2016.